

咏物诗 元 谢宗可

钦定四库全书

集部五

咏物诗

别集类四

元

提要

（臣）等谨案咏物诗一卷元谢宗可撰宗可自称金陵人其始末无考相传为元人故顾嗣立元百家诗选录是编于戊集之末亦不知其当何代也昔屈原颂橘荀况赋蚕咏物之作萌芽于是然特赋家流耳汉武之天马班固之白雉寶鼎亦皆因事抒情非主于刻画一物其托物寄怀见于诗篇者蔡邕咏庭前石榴其始见也沿及六朝此风渐盛王融谢朓至以唱和相高而大致多主于隶事唐宋两朝则作者蔚起不可以屈指计矣其特出者杜甫之比兴深微苏轼黄庭坚之譬喻奇巧皆挺出众流其余则唐尚形容宋参议论而寄情寓讽旁见侧出于其中其大较也中间如雍鹭鸶崔鸳鸯郑鹧鸪各以摹写之工得名当世而宋代谢蝴蝶等遂一题衍至百首但以得句相夸不必缘情而作于是别歧为诗家小品而咏物之变极矣宗可此编凡一百六首皆七言律诗如不咏燕蝶而咏睡燕蝶不咏雁莺而咏雁字莺梭其标题皆纖仄盖沿雍陶诸人之波而弥趋新巧瞿宗吉归田诗话曰谢宗可百咏诗世多传诵除走马灯莲叶舟混堂睡燕数篇难得全首佳者其说信然四诗亦非出高作顾嗣立录其四十首又摘其警句二十联其中如笔阵之怒卷龙蛇云雾泣长驱风雨鬼神惊则伤于麤豪螳螂簪之鬓雪冷侵霜斧落髮云低压翠裳空则伤于凑砌亦未可言工致特以格调虽卑才思尚艳诗教广大宜无所不有元人旧帙姑存之备一体耳归田诗话又曰曩见邱彦能诵宗可卖花声诗一首百咏中不载盖性既喜此一格则随事成吟非作此一集而絕笔彦能所诵殆出于此集既成之后欤

乾隆四十六年十月恭校上

总纂官 （臣）纪昀 （臣）陆锡熊 （臣）孙士毅

总校官 （臣）陆费墀

●钦定四库全书

咏物诗

（元）谢宗可 撰

睡燕

补巢衔罢落花泥困顿东风倦翼低金屋昼长随蝶化雕梁春尽怕莺啼魂飞汉殿人应老梦入乌衣路转迷却怪卷帘人唤醒小桥深巷夕阳西

睡蝶

不趁游蜂上下狂闲舒倦翅怯寻芳花房舞罢春酣重蕙径栖迟晓梦长贪困有谁
怜褪粉返魂无力去偷香漆园傲吏忘形久莫到蘧蘧枕上忙

纸帐

清悬四壁剡溪霜高卧梅花月半床茧瓮有天春不老瑶台无夜雪生香觉来虚白
神光发睡去清闲好梦长一枕总无尘土气何妨留我白云乡

纸衾

霜捣溪藤一幅新醉来高卧付诗人松床夜暖云生席蕙帐香融雪满身翡翠多情
嫌寂寞鸳鸯无分乐清贫枕边不作红尘梦睡足梅花玉洞春

茶筴

此君一节莹无瑕夜听松声漱玉华万缕引风归蟹眼半瓶飞雪起龙牙香凝翠发
云生脚湿满苍髯浪卷花到手纤毫皆尽力多应不负玉川家

酒旗

水村山郭酒初香红影青青字一行垆畔低悬花雾湿檐阴斜揭柳风凉指挥意马
冲愁阵摇曳心旌入醉乡惆怅步兵招不起半竿空自舞斜阳

诗瓢

雨蔓霜条老翠壶吟边不是酒葫芦剖开架上轮囷玉着尽胸中错落珠满贮苦心
留宇宙深藏清气付江湖谁家半腹能千首为问山人果在无

笔阵

授笔登坛拜墨卿霜毫不用铁为兵战酣已拔三都垒奏捷还攻五字城怒卷龙蛇
云雾泣长驱风雨鬼神惊攀蟾独扫千军退功夺中书第一名

雁宾

地北天南万里身惊寒昨夜过边城暂随沙漠秋来梦留得湘江社后春水宿云飞
同是客风嘹月唳自相亲荒汀断渚年年路应认芦花作主人

蝶使

颁红降紫绕芳菲催就东风锦万机采访有心香外舞指挥无计日边飞晓穿竹径
应持节暖驻花房欲绣衣可解黄花惊别梦折梅休恨寄难归

雁字

芦花月底寄秋情阵影南飞势不停一画写开湘水碧半行草破楚天青云笺冷印
虫书迹烟墨浓摹鸟篆形题尽子卿心事苦断文无数落寒汀

莺梭

自织春风金缕衣穿红度翠往来飞柳堤暗卷丝千尺花坞横抛锦万机时见枝头
捎蝶去不愁壁上化龙归羞同杼柚劳红女一掷迁乔愿有违

龙杖

鳞甲光摇玉一枝幽宫跃出袖中持多因掌握提携晚休恨飞腾变化迟缓策不愁

山雨湿醉横长有野云随会看挂壁风雷起莫待诗翁过葛陂

虎枕

缚取南山白额儿鼻如雷吼卧支颐床头夜啸威长在帐底风生醉不知探穴捋须
应有梦寝皮食肉未为奇何如敌伏重华殿聴彻箫韶九奏时

萤灯

微萤闪闪拂晴波几度黄昏误舞蛾银粟无烟栖碧藓玉虫留影缀青莎秋空雨歇
寒光坠晚径风闲冷烬多欲唤纱囊车武子为渠还赋短檠歌

雁阵

渡江秋影又南征折苇衔枚夜不惊冷聚圆沙盘地轴晓浮寒水落天衡风驰截破
湘烟阔云拥斜冲塞月明洲渚网罗应有伏横空千里不留行

鹤骨笛

满窍芝香透骨浓谁将仙蜕截星筒从教庭下梅花落似怨山中蕙帐空三弄瑶林
惊晓露一声华表泣秋风絶胜瘞作江边土好奏南飞步月宫

虎顶杯

骨醉于菟一掬春掌中白额气如云南山月晕梦初醒北海风生酒半醺畅饮自懷
班定遠酣歌谁酹顾叅军醉乡亦有封侯地笑绾金符便策勲

鹭羽扇

立烟睡雨白蒙茸尽付驱炎掌握中暑退沙头千点雪凉生顶上几丝风曾闻异物
陪修静莫染纖尘障庾公挥动半襟诗梦醒谁怜拳足蓼花丛

鼠须笔

夜逐虚星上月宫奋髯夺得管城公橐中不搅吟窗梦指下先争翰苑功莫笑砚池
濡醉墨絶胜仓廩饱陈红平生啮尽诗书字散作龙蛇落纸中

龙涎香

瀛岛蟠龙玉吐零轻氛飞绕博山青暖浮蛟窟潮声怒清彻骊宫蛰睡醒碧脑贮箱
收海气红薇滴露洗云腥雨窗篝火浓熏破梦驾苍鳞上帝庭

螳螂簪

螭蛸枝上化熏风飞掠诗翁短帽中鬓雪冷侵霜斧落髮云寒压翠裳空为裁象齿
形如在试插蝉冠气尚雄开卷寻行烦一指不须当辙怒庄公

蟾蜍水滴

三足爬沙饮海归案头飞堕晓风吹惯看毛颖临池浴不借姮娥入月骑蓄润凿开
琲磊落分涓滴尽墨淋漓胸中一掬恩波在自有龙蛇遶笔时

螺杯

香醅浮蚁入旋涡半殼苍琼费琢磨应愧美人盘宝髻且供豪客卷金波尊中緑照
珠光润掌上春擎海气多安得沧溟俱变酒垂涎终日饮如何

芦花被

白似杨花暖似烘纖尘难到黑甜中软铺香絮清无比醉压晴霜夜不融一枕和秋眠落月五更飞梦逐西风谁怜宿雁江汀冷赢得相思旧恨空

莲叶舟

穩棹红衣泛渺茫风帆浪楫水云乡晓撑太华半峰月晚载西湖十里香藕放雪丝应作纜荷擎翠柄若为檣不须更捧金仙足太乙山人梦正凉

玉壶冰

白似中干满不倾是空是色冻无声十分莹洁瑕疵淨一樣光辉表里明云母夜藏珠晕冷水晶寒孕月华清美人睡起销金帐折得梅花插未成

网巾

乌纱未解涤尘烦一网清风两鬓寒筛影细分云缕滑棋纹斜界雪丝干不须渔父灯前结且向诗翁镜里看头上任渠笼络尽有时怒髮亦冲冠

胭脂

仙花和露搗芳尘驻得宫娥不老春香晕红潮生玉颊煥融絳蜡点樱唇渭流涨腻人应遠宫井留斑恨愈新镜倚綠窗娇梦醒素纖微蘸晚妆匀

琉璃帘

澄光摇碎一庭秋莹碧玲珑约浪浮净练悬风晴未落明河接地晓难收冰痕半卷银钩冷绣带低垂玉缕柔纖手怯寒轻揭起不妨月影上南楼

走马灯

飙轮拥骑驾炎精飞绕人间不夜城风鬣追星低弄影霜蹄逐电去无声秦军夜溃咸阳火吴炬宵驰赤壁兵更忆雕鞍年少梦章台踏碎月华明

泡灯

焰吐兰膏映水晶澄泓不动一泓轻天星影落水壶夜神汞光凝火镜明碧晕浮春丹气湿红云泛暖玉华清游鱼不觉三更冷飞入琉璃井底行

雪灯

一炬烧寒照夜长玉虫飞入白纱囊冰壶吞月涵秋影海蚌懷珠吐夜光六出自随飞烬落寸辉不受积阴藏浑疑冻壑寒崖底忽见东风转太阳

莲灯

万点芙蓉午夜芳醉看疑似水云乡兰缸照破西湖梦火树烧残太液香焰暖应愁擎夜雨烬寒不为倒秋霜元宵庭院东风晓零落红衣遶画梁

水灯

波明焰暖晚风间泡影飞来镜里看万点芙蓉开碧沼一天星斗落水盘珠浮赤水光犹湿火浴丹池夜未乾照破鱼龙波底梦幽宫不怕五更寒

书灯

吾呶声里漏初长愿借丹心吐寸光万古分明看简册一生照耀付文章芸编清逼
兰膏暖花烬时粘竹汗香明日金莲供草制几人风露在秋堂

灯花

谁分春色上银台小草梢头吐烬煤丹萼擎烟深夜结朱蕤喷火背阳开吟窗对酒
分诗罢旅馆敲棋待客来愿得东君膏泽满芳心一点不成灰

餅笙

炉头莫为热中鸣且作松风入耳清火候抽添成别调汤痕深浅变秋声谁知冷暖
情难尽自恨炎凉诉不平何用绛唇吹玉管纖簧低咽夜三更

铁砚

不用端溪割紫云铸来壮士铁心存一方自出炉锤巧百炼原无斧凿痕金炆冷涵
池水润土花腥蚀墨烟昏坚刚千古难磨了谁为扶桑赋晓暉

渔簑

翠结香莎付钓舟一竿风雨不须愁苔矶夜泊披寒去苇岸昏归带湿收月冷笼衣
眠舵尾天晴随网晒船头羊裘莫笑狂奴错也着烟波万顷秋

钓丝

临流纖影众鳞惊消得长縵一缕轻钩坠乱縈春水碧竿垂斜袅晚风清牵回江上
烟波梦掣断人间富贵情我欲笑携千尺去桃花浪里拔鯢鲸

雪珠

万斛明玑满地圆瑶龙吞蚌入云边泪含晓雨光犹湿声碎天风孔未穿寒缀松腰
联玉佩冷攢梅脸结花钿阿滕撒尽难收拾为买丰年不用钱

霜花

粲粲瑤英借露浮日高还付水东流剪裁应费金神巧开落从教玉女愁有艳淡妆
宫瓦晓无香寒压板桥秋五更不怕楼头角吹到梅花特地稠

柳眼

媚煥窥春浅碧浮欲开还闭半顰羞露垂烟缕秋波溜雨歇风条晓泪收上苑困酣
兴废梦灞桥看尽古今愁五株彭泽回青否应是生花雪满头

荷钱

青蚨飞遶半池莲化作波心万点圆白水真人应爱宝上清童子解留钱买空太液
繁华梦占断西湖富贵天一把藕丝穿不起五铢衣冷碧波烟

纸鸢

孤骞穩驾剡溪云多少儿童仰羨频半纸飞腾元在己一丝高下岂随人声驰空碧
东风晓影度遥天化日春谁道致身无羽翼回看高举絕红尘

雪狮

幻出狻猊雪一团玉光如焰起毫端棱棱冰霰藏锋锐飒飒风霜满肺肝气逼熊羆

应股栗威临犀象亦心寒从人错认盐形虎莫向朝阳仰鼻看

蟠梅

萦青绊碧裂苍苔岁晏寒香宛转来蛟蛰冻云冰骨瘦龙眠夜月玉鳞开风霜气势
从千折铁石心肠亦九回祇为东君甘自屈不教枉占百花魁

挂兰

江浦烟丛困草莱灵根从此谢栽培移将楚畹千年恨付与东君一缕开湘女久无
尘土梦灵均元是栋梁材午窗试读离骚罢却怪幽香天上来

花雾

倦紫酣红总未醒暗熏芳泪滴无声罗帏隐绣迷春色绮縠笼香护晓晴薄暝枝头
留睡蝶轻阴树底咽啼莺东风卷到阑干曲半湿游丝舞不成

茶烟

玉川垆畔影沉沉淡碧萦空杳隔林蚓窍声微松火暗凤团香暖竹窗阴诗成禅榻
风初起梦破僧房雪未深老鹤归迟无俗侣白云一缕在遥岑

砚冰

裂地层阴透马肝墨花含冻鏤毫端一泓晓色玄霜重半夜天风黑水干沼面烟凝
星影暗潭心云翳玉光寒便将呵作清泠雨笔扫人间酷暑残

游丝

摇曳春光百尺轻烟绡舞断任纵横暗萦芳恨应无力乱绾春愁似有情一缕绿杨
风正软半痕红杏雨初晴莫教飞到天机上去恐悞龙梭织不成

海蛰

层涛拥沫缀虾行水母含秋孕地灵海气冻凝红玉脆天风寒结紫云腥霞衣褪色
水涎滑瑯缲烹香酒力醒应是楚江萍实老误随潮信落沧溟

江潮

灵胥怒辟岛门开十万神兵战鼓回龙决黄河银浪涌鳌翻坤轴玉山摧半江飞雪
横空起千里奔雷撼地来欲驾云帆沧海去秋风八月上蓬莱

绿阴

万树东风涌翠澜遮藏芳恨料应难入帘苍霭暮春晚满地碧云清昼寒柳暗池台
烟乍湿槐深门巷雨初干阶前花落无人到又染苔痕上石栏

红树

枫坞梨园醉晓霜缟衣零落舞金商半山留日树无影一径有风花不香萧寺烟晴
秋易老御沟水急恨空长诗人自爱停车晚还记清阴六月凉

醉乡

曾笑三闾不解游移家欲向曲城头人酣方外鸿荒梦谁识尘中富贵愁夜月放船
浮酒海春风扶杖上糟丘相逢还似无何有唤起东皋为赠侯

尘世

人海深藏混混中非烟非树遶空蒙六街绮绣迷香紫九陌笙歌踏软红微步缓随罗袜起清歌飞遶画梁空南来一骑蛾眉笑又送长安荔入宫

仙槎

曾作河源万里舟尘根已断卧蛟虬无心下土承烟雨有路层霄犯斗牛破浪遶冲银汉晓凌风径渡碧天秋归来带得支机石谁识人间博望侯

天灯

龙逐炎精下紫宫夜深不肯落云中光分霄汉三更黑影乱星辰万点红玉树倚天擎火齐金绳系日挂瑶空照开仙阙光明路绛节霓旌稳驾风

醒酒石

子孙犹自问监军醒籍千年迹已陈苍骨冷侵酣枕梦苔痕清逼醉乡春西风别墅啼山鬼落日朱崖泣海神牛李相倾果何得太湖甲乙更谁人

无弦琴

独茧长纆底用抽蛇纹空鑱鳳枝秋落星留晕绳光断冻瀑无声练影收别鹤那闻风外泣孤鸾不向月中愁多情只有柴桑老寂寂高山水自流

橘杯

芥穰初碎擘轻瓿一饮何须大白浮琼液晓凝沧水雾金波夜浸洞庭秋寒香喷手醒初解霜气浮尊暖未收酩酊敲棋呼二叟梦中同作醉乡游

梅杖

紫玉槎牙蚀藓痕黄昏扶醉倍精神一枝冷曳孤山雪七尺横拖庾岭春江路策云香在手溪桥挑月影随人归来却笑林和靖还现堂中上座身

松酿酒

大夫何事亦餽糟自恨争名爇火劳【句疑有讹】春色未香浮蚁绿雨声先沸老龙膏不须琥珀供灵药且作珍珠滴小槽傲却岁寒消一醉凉州空自换葡萄

雪煎茶

夜扫寒英煮绿尘松风入鼎更清新月团影落银河水云脚香融玉树春陆井有泉应近俗陶家无酒未为贫诗脾夺尽丰年瑞分付蓬莱顶上人

煮茶声

龙芽香暖火初红曲几蒲团听未终瑞雪浮江喧玉浪白云迷洞响松风蝇飞蚓窍诗怀醒车绕羊肠醉梦空如诉苍生辛苦事蓬莱好问玉川翁

卖花声

春光叫遍费千金紫韵红腔细细寻几处又惊游冶梦谁家不动惜芳心响穿红雾楼台晓情逐香风巷陌深妆镜美人听未了绣帘低揭画檐阴

松枝火

薜骨谁教劫火侵欲将春意破穷阴鳞鬣光动红云起膏液香融紫雾深余烬尚留霜后节死灰难灭岁寒心有时焰气随风转犹是苍龙涧底吟

藕花风

舞落红衣起未休水云乡里正飏飏五更清逼银塘路六月凉生玉井秋颭浪低翻霞影乱凌波轻弄锦香浮莫教吹醒鸳鸯梦好送真人一叶舟

絮化萍

点缀离人恨已多水流云散为消磨半篙晴浪星无数两岸东风雪几何脱白定知沾化雨取青应是谢恩波满池为护苍天影休逐春归绕汴河

松化石

苔根薜干势棱嶒不向山中变茯苓傲雪心顽龙蜕骨啸风声断虎留形特坚节操磨今古肯献瑰奇列丙丁底用区区梁栋具直须炼补老天青

月中桂花

金粟如来幻化身嫦娥留得护冰轮枝横大地山河影根老层霄雨露春长有天香飞碧落不教仙子种红尘折来何必吴刚斧还我凌云第一人

水中梅影

澄澄寒碧印冰条云母屏开见阿娇春色一枝流不去雪痕千点浸难消临风倚槛云鬟湿带月凌波玉佩摇最是黄昏堪画处横斜清浅傍溪桥

水中云

絮团冷蘸碧琉璃舒卷还如湿未晞苍狗倒随天影落玉鸾低入镜光飞浓遮晚浪摇秋月淡隔晴漪漾夕晖莫怪巫山台下雨凌波好向梦中归

水中月

晴波浸月月波浮玉兔凉生万顷流丹桂影沉江浦夜白莲光浴海天秋蛟人泣罢珠还湿龙女妆残镜未收应是广寒眠不得水晶宫里夜深游

白莲

三千宫额翠云房洗褪铅华浅淡妆仙掌月明应自怨东林梦远为谁芳波澄夜静花无影露冷风清玉有香舞罢霓裳谁得似六郎清瘦比何郎

红菊

锦烂重阳节到时繁华梦里傲霜枝晚香带冷凝丹粒秋色封寒点绛蕤淡暎残虹迷老圃浓拖斜照落东篱灵砂换却渊明骨倦倚西风不自知

藕丝

绊玉纒香吐未齐莲房纒出蛹初肥纖毫何补寸心苦几缕空萦七窍飞园客可能抽翠茧灵均难为制荷衣年年五月无人买欲织蛟绡不上机

菰线

蛟人绣满水仙裳地轴天机不敢藏冰穀冷纒青缕滑翠钿清缀玉丝香江湖有味

牵情久京洛思归引兴长欲剪吴淞缝不得谩拖秋思绕诗肠

同根竹

竞秀冰霜一种奇骈头曾脱锦■〈衤朋〉儿西山二子情依旧湘浦双娥影镇随
高节元非连理树虚心共是岁寒枝莫教移作仙人杖恐化雌雄下葛陂

并蒂兰

碧蕊连芳并萼擎春风江浦对含情不妨燕姑重占梦应愧湘累独解清霜节百年
期共老国香一点为谁争诗人莫比双渠怨幸有离骚日月明

红梅

梨云无梦倚黄昏薄倩朱铅蚀泪痕宿酒破寒熏玉骨仙丹偷暖返冰魂茜裙影露
罗衣卷霞佩香封缟袂温回首孤山斜照外寻真误入杏花村

苔梅

一夜蟠龙裂翠鳞土花深护玉精神苍含满树黄昏月碧老孤根太古春姑射香熏
荷制好逋仙青入华衣新料应不为天风冷自恐冰肌受点尘

雪月梅

苔枝擎重半朦胧漠漠梨云梦不同香护姮娥眠玉鉴影随姑射下瑶宫冰蟾光透
南枝夜翠羽声凄古树风天上人间浑一色几分春意有无中

绿萼梅

萼绿仙人下玉堂清魂夜化雪芬芳荷衣薄衬霓裳冷兰佩浓熏缟袂香晓额浮酥
凝浅黛春容点翠照新妆多因误入罗浮梦愁绝黄昏鬓已苍

梅魂

枝南枝北路迢迢飞入孤山夜寂寥水月浮香应自返溪风弄影为谁招缟衣梦里
和愁断玉箫声中逐恨消似欠灵均歌楚些逋仙坟草冷萧萧

梅梦

芳魂和睡倚南枝羞比梨花蝶未知暖入罗浮春困早香迷姑射晓醒迟不愁夜月
青衣湿应怕江天画角吹一点调羹心事在宵衣枕上觉多时

松梅

挺秀凝香一样清何妨同结岁寒盟风霜正共孤高概雪月相看太古情翠袖不禁
水骨冷苍颜还照玉肌明孤根雅操千年节未许繁华老此生

月下梅

月到梅花分外明暗香孤影鬪双清吟随野鹤依瑤树卧听飞鸾载玉笙酒醉不知
霜满皐书声常共漏三更此中意味无人识谩说仙家白玉京

桃梅

去年人面映纱窗今日酸心傍石缸白雪红霞俱第一暖蜂寒蛭不成双神臣岁晚
希调鼎姑射年深拟度江独立黄昏人似玉刘郎重见亦心降

问梅

寻春踏雪过西湖试叩风前玉一株香影为谁甘寂寞精神何独占清癯钟残角断愁多少月落参横梦有无吟遶南枝浑不应好将心事唤林逋

挑梅

折取孤山玉雪花杖藜高挂踏烟霞负他白鹤看仙塚带尔青蚨到酒家有脚阳春词可证无言姑射貌堪夸相携相伴归时晚添个随人月一牙

龙形松

夭矫擎云海上来蜿蜒蜕骨老莓苔紫髯夜湿千山雨铁甲春生万壑雷影动欲翻平陆起声号如卷怒潮回蜷枝冷挂岩前月犹是擎珠照九垓

鸳鸯梅

两两魁春簇锦机文衾梦觉月分辉枝头交颈栖香暖花底同心结子肥金殿鏤烟妆粉额玉堂环水浴红衣有情一种随流去莫被风飘各自飞

鸳鸯菊

秋入金塘脱锦裳芳心并倚紫纱囊韩凭枕上情难了陶令门前梦更长深院霜清宫瓦冷东篱月落绣衾凉谁知连理枝头恨还有西风晚节香

半日闲

闲处光阴未有涯偶然一晌到山家坐看云起昼停午静听泉流日未斜槐影正圆初破睡竹阴为转罢分茶也胜忙里风波客十二时中老鬓华

晓色

遠似烟霏近似空非明非夜两朦胧一天清露洗难退几抹曙云遮不穷断角楼台浓淡里残灯院落有无中苍茫半逐鸡声散又被朝阳染作红

水纹

新绿粼粼深浅漪织成春色上苔衣一池碧晕雨初落千叠翠鳞风更微净縠光摇湘女镜轻罗影动水仙机何如袖取并刀去快剪吴淞半幅归

竹夫人

胸次玲珑粉黛羞宵征何必抱衾裯应无云雨三更梦自有冰霜六月秋尽节每曾陈讽刺虚心那解老温柔専房不怕蛾眉妒只恐西风动别愁

白雁

翅老西风点缀霞秋江难认宿芦花云边字缺银钩断月下箏闲玉柱斜影乱飞鸥回遶浦阵迷宿鹭落平沙声声叫起苏郎恨为带吴霜染鬓华

埵灯

拔地烧空宝炬长烛龙挂影照穹苍七层火树云生暖九曲神珠夜吐光霞点彤■〈施，童代也〉归淨界星随絳节下西方如来应到天坛上万斛金莲绕步香

沙书

玄沙一握舞蛟虬草圣何须墨染头
鸟过篆文归铁画螭行清响落银钩
竹间日射文星粲纸上风惊字迹收
大手莫将成末艺论功宁媿管城侯

双陆

彩骰清响押盘飞曾记唐宫为赐绯
影入空梁残月在声随征马落星稀
重门据险应输掷数点争雄莫露机
惟恨懷英夸敌手御前夺取翠裘归

浴堂

香泉涌出半池温难洗人间万古尘
混沌殼中天不晓淋漓气底夜长春
波涛鼓怒喧风雨云雾随阴护鬼神
却笑相逢裸形国不知谁是浴沂人

咏物诗